



Broj: 05-02-35762/16 ZJ  
Sarajevo, 26.12.2016. godine

Na osnovu člana 26. i 28. stav 2 Zakona o Vladi Kantona Sarajevo ("Službene novine Kantona Sarajevo" br. 36/14 - Novi prečišćeni tekst i 37/14 – Ispravka) i poglavlja III tačka 1. i tačka 4. Plana interventnih mjera u slučajevima prekomjerne zagađenosti zraka u Kantonu Sarajevo donesenog na 53. vanrednoj sjednici Vlade Kantona Sarajevo od 22.12.2016. godine, Operativni štab na sastanku održanom 26.12.2016. godine donosi:

## ODLUKU

### I

Ukida se Treća epizoda "**Uzbuna**" povećanih koncentracija zagađujućih materija u zraku u Kantonu Sarajevo, donesena Odlukom broj 05-02-35762/16 od 24.12.2016.godine i Odlukom o dopuni odluke broj 05-02-35762-1/16 od 24.12.2016.godine.

### II

Proglašava se Druga epizoda "**Upozorenje**" povećanih koncentracija zagađujućih materija u zraku u Kantonu Sarajevo.

### III

Mjere koje se preduzimaju u okviru epizode "**Upozorenje**" obuhvataju:

- Preporuku da se nastava u školama ograniči do 17,00 sati u toku dana, s tim da se u vrijeme pauza učenici zadržavaju u školskim prostorima, te da se ne koriste školska dvorišta i da se obustave vannastavne aktivnosti u vrijeme trajanja ove epizode,
- Ograničenja u radu postrojenja za proizvodnju toplotne energije snage preko 50kW koja koriste čvrsta goriva i lož ulja u smislu smanjenja temperature za minimalno 3°C, promjene energenta za produkciju toplote prelaskom na ekološki prihvatljivije, u skladu sa raspoloživim mogućnostima, ograničavanje broja radnih sati ili na drugi način, uz pojačan inspekcijski nadzor,
- Upozorenje da sva postrojenja za proizvodnju toplotne energije snage preko 1 MW koja koriste prirodni gas, smanje temperaturu u prostorima koje zagrijavaju za minimalno 2°C,
- Osiguravanje protoka motornih vozila bez dužeg zadržavanja na glavnim gradskim raskrsnicama sa izmjerenim najvećim koncentracijama zagađujućih materija, izmjenom signalnog plana semaforiziranih raskrsnica na glavnoj gradskoj saobraćajnici od Bašćaršije do Ilidže, čime bi se uticalo na dužinu trajanja "zelenog vala",
- Upotreba sredstava za obaranje čestica prašine PM<sub>10</sub> od strane komunalnih preduzeća i drugih pravnih lica, koja vrše zimsko održavanje cesta,



- Zabrana izvođenja grubih građevinskih radova na otvorenom i zatvorenom prostoru,
- Ostale mjere za koje Operativni štab procijeni da mogu doprinijeti poboljšanju kvaliteta zraka.

#### IV

Pored mjera iz Tačke III ove Odluke, primjenjivati će se i mjere iz Prve epizode – «Pripravnost», i to:

- Intenziviranje aktivnosti komunalnih preduzeća i drugih pravnih lica koji vrše redovno (mehaničko i ručno čišćenje i pranje cesta), kao i zimsko održavanje cesta uz upotrebu "mokrog postupka", radi smanjenja emisija prašine,
- Intenziviranje aktivnosti komunalnih preduzeća i drugih pravnih lica na čišćenju javnih površina u smislu Zakona o komunalnoj čistoći,
- Poziv pravnim licima da u zavisnosti od svojih mogućnosti izvrše pomjeranje početka radnog vremena, kako bi se doprinijelo rasterećenju kapaciteta javnog gradskog prevoza i gradskih saobraćajnica.
- Zabrana kretanja automobila (na potezu Bašćaršija – Ilidža u oba smjera), čiji benzinski motori imaju normu manju od EURO1 ili dizel motori normu manju od EURO3 uz pojačane kontrole organa MUP-a. Ovo se ne odnosi na vozila policije, inspekcije, ministarstva odbrane, javnog gradskog prevoza, javnih komunalnih preduzeća, vozila sa diplomatskim tablicama i vozila hitnih intervencija (civilne zaštite, hitne pomoći, vatrogasaca),
- Zabrana saobraćaja za teretna motorna vozila čija je najveća dozvoljena masa preko 3,5 tone na glavnom gradskom longitudinalnom pravcu na potezu od Bašćaršije do Nedžarića sa preusmjerenjem saobraćaja na alternativne pravce kretanja. Ovo se ne odnosi na vozila javnog gradskog prevoza, javnih komunalnih preduzeća, vozila hitnih intervencija i dostavna vozila za prehrambene proizvode.

Tehnička regulacija saobraćaja za vrijeme zabrana vršit će se privremenom saobraćajnom signalizacijom i opremom, znacima i naredbama koje daju ovlaštena policijska lica MUP-a Kantona Sarajevo.

Za vrijeme trajanja zabrane saobraćaja, upravitelji cesta su dužni svaki iz svoje nadležnosti izvršiti postavljanje privremene saobraćajne signalizacije i opreme, uključujući i održavanje iste.

- Upozorenje da je kažnjivo svako spaljivanje otpada u kućanstvima i pozivanje, da se u slučaju sumnje, takva nedozvoljena postupanja prijave na Eko-telefon br. 033/66 00 00 ili telefon Kantonalnog operativnog centra civilne zaštite br: 121, radi daljnjeg djelovanja nadležnih inspekcija općina i Kantona,
- Upozorenje stanovništvu da svojim ponašanjem i aktivnostima dodatno ne doprinose zagađenju zraka,
- Apeli vozačima za racionalno i odgovorno korištenja privatnih automobila,
- Pojačan inspeksijski nadzor nad gradilištima,
- Upozorenje rizičnim grupama stanovništva za smanjenje kretanja.

#### V

Odluka stupa na snagu odmah.



web: <http://mpz.ks.gov.ba>  
 e-mail: [mpz@mpz.ks.gov.ba](mailto:mpz@mpz.ks.gov.ba)  
 Tel: + 387 (0) 33 562-029, Fax: + 387 (0) 33 562-031  
 Sarajevo, Reisa Džemaludina Čauševića 1



## Obrazloženje


Operativni štab Vlade Kantona Sarajevo na sastanku održanom u subotu 24.12.2016. godine donio je Odluku broj: 05-02-35762/16 o proglašenju III Epizode "Uzbuna" povećanih koncentracija zagađujućih materija u zraku u Kantonu Sarajevo i dopunu Odluke broj 05-02-35762-1/16 od 24.12.2016.godine.

Stručno tijelo za koordinaciju i nadzor je u skladu sa Planom interventnih mjera u slučajevima prekomjerne zagađenosti zraka u Kantonu Sarajevo sačinilo Izvještaj na dan 26.12.2016. godine u kome je konstatovano da je prag uzbune za  $PM_{10}$  dana 25.12.2016. godine prekoračen samo na stanici Vijećnica ( $410,2 \mu\text{g}/\text{m}^3$ ), dok je na ostalim stanicama zabilježene vrijednosti ispod praga uzbun i to: Ilidža  $374,6 \mu\text{g}/\text{m}^3$  i Otoka  $309,6 \mu\text{g}/\text{m}^3$ . Pored toga, meteorološka situacija ukazuje na promjenu vremenskih prilika u vidu padavina praćenih slabim vjetrom.

Na sastanku održanom dana 26.12.2016. godine, a nakon razmatranja Izvještaja Stručnog tijela za koordinaciju i nadzor, iznošenja stavova sa Kolegija Vlade Kantona Sarajevo, kao i izjašnjenja članova Operativnog štaba po Prijedlogu Odluke, Operativni štab je istu donio kao u dispozitivu.

**PREDSJEDNIK  
OPERATIVNOG ŠTABA**

  
**Čedomir Lukić, dipl. ing. arh.**



web: <http://mpz.ks.gov.ba>  
e-mail: [mpz@mpz.ks.gov.ba](mailto:mpz@mpz.ks.gov.ba)  
Tel: + 387 (0) 33 562-029, Fax: + 387 (0) 33 562-031  
Sarajevo, Reisa Džemaludina Čauševića 1

